



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

Broj:

Sarajevo, __.__.2020. godine

Na osnovu člana 26. stav 1. tačka 2. i člana 74. stav 1. Statuta Grada Sarajeva („Službene novine Kantona Sarajevo”, broj 34/08 – prečišćeni tekst), Gradsko vijeće Grada Sarajeva, na sjednici održanoj __.__.2020. godine, usvojilo je

Izvještaj o provođenju Odluke o utvrđivanju i načinu sufinansiranja kulturnih manifestacija od posebnog interesa za Grad Sarajevo u 2019. godini

PREDSJEDAVAJUĆI GRADSKOG VIJEĆA

Dr. Igor Gavrić

Adresa: Hamdije Kreševljakovića 3:
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba





Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADONAČELNIK

IZVJEŠTAJ
O PROVOĐENJU ODLUKE O UTVRĐIVANJU I NAČINU SUFINANSIRANJA KULTURNIH
MANIFESTACIJA OD POSEBNOG INTERESA ZA GRAD SARAJEVO U 2019. GODINI

PREDLAGAČ:
GRADONAČELNIK

OBRAĐIVAČ:
GRADSKA SLUŽBA ZA OBRAZOVANJE,
KULTURU, SPORT I MLADE

Sarajevo, maj 2020. godin

Adresa: Hamdije Kreševljakovića 3
71000 Sarajevo, BiH
Tel: +387 33 407 443
Fax: +387 33 208 341
Email: grad@sarajevo.ba
Web: www.sarajevo.ba



Izvještaj je pripremljen u skladu sa Programom rada Gradskog vijeća Grada Sarajeva za 2020. godinu i ima za cilj potpuno informisanje vijećnika o realizaciji Odluke Gradskog vijeća Grada Sarajeva o utvrđivanju i načinu sufinansiranja kulturnih manifestacija od posebnog interesa za Grad Sarajevo. Odlukom Gradskog vijeća Grada Sarajeva o utvrđivanju i načinu sufinansiranja kulturnih manifestacija od posebnog interesa za Grad Sarajevo („Službene novine Kantona Sarajevo“, broj 10/19), kulturne manifestacije od posebnog interesa za Grad Sarajevo su:

1. Internacionalni teatarski festival MESS
2. Sarajevo Big Band
3. Međunarodna književna manifestacija „Sarajevski dani poezije“
4. Sarajevske večeri muzike SVEM
5. Internacionalni festival Sarajevo „Sarajevska zima“
6. Sarajevo Film Festival
7. Bašćaršijske noći
8. Internacionalni muzički festival JAZZ FEST Sarajevo
9. Balet Fest Sarajevo
10. Festival Bookstan
11. Festival dječije umjetnosti FEDU Sarajevo.

II Provođenje Odluke o utvrđivanju i načinu sufinansiranja kulturnih manifestacija od posebnog interesa za Grad Sarajevo u 2019. godini

U skladu sa članom 5. Odluke o utvrđivanju i načinu sufinansiranja kulturnih manifestacija od posebnog interesa za Grad Sarajevo („Službene novine Kantona Sarajevo“, broj 10/19), organizatori manifestacija su bili dužni, najkasnije do 30. septembra 2018. godine, gradonačelniku Sarajeva, putem Gradske službe za obrazovanje, kulturu, sport i mlade, podnijeti zahtjev za sufinansiranje manifestacije sa obrazloženim programom, planiranom finansijskom konstrukcijom programa, tj. manifestacije, kao i kompletnom dokumentacijom kojom se dokazuje ispunjenje općih i posebnih kriterija iz člana 4. Odluke, a radi planiranja sredstava u Budžetu Grada Sarajeva za narednu 2019. godinu. Služba je uputila poziv organizatorima kulturnih manifestacija da u skladu sa Odlukom dostave zahtjeve i dokumentaciju za 2019. godinu.

Zahtjeve, programe i prateću dokumentaciju dostavili su organizatori sljedećih kulturnih manifestacija:

1. Internacionalni teatarski festival MESS
2. Sarajevo Big Band
3. Međunarodna književna manifestacija „Sarajevski dani poezije“
4. Sarajevske večeri muzike SVEM
5. Internacionalni festival Sarajevo „Sarajevska zima“
6. Sarajevo Film Festival
7. Internacionalni muzički festival JAZZ FEST Sarajevo
8. Balet Fest Sarajevo
9. Festival Bookstan
10. Festival dječije umjetnosti FEDU Sarajevo

Služba je razmatrala sve pristigle zahtjeve i programe sa stanovišta značaja za Grad Sarajevo, odnosno njegovog posebnog interesa, te u skladu sa kriterijima utvrđenim ovom Odlukom, dostavila stručno mišljenje Savjetu za kulturu, kojeg je u skladu sa članom 6. Odluke imenovao gradonačelnik.

Rješenjem gradonačelnika broj 01/04-05-2146/19 od 21.03.2019. godine, imenovan je Savjet za kulturu u sljedećem sastavu:

1. Ivica Šarić, predsjednik Savjeta
2. Milan Trivić, zamjenik predsjednika
3. Erna Čolić, član
4. Dragana Solaković, član
5. Amina Deljković, član

Savjet za kulturu je na sastanku od 09.04.2019. godine, razmotrio prijedlog i mišljenje nadležne Službe, te shodno valjanosti, značaju i kvalitetu ponuđenog programa, svoje stručno mišljenje, kao i prijedlog visine sredstava uputio u dalju proceduru.

Gradonačelnik kao ovlašteni predlagач, uvažio je prijedlog i mišljenje Savjeta za kulturu i shodno tome dostavio na razmatranje Gradskom vijeću Grada Sarajevo prijedloge Odluka o sufinansiranju kulturnih manifestacija od posebnog interesa za Grad Sarajevo u 2019. godini.

Gradsko vijeće Grada Sarajeva na sjednici održanoj 24.04.2019. godine, donijelo je sljedeće odluke:

- 1) Odluka o sufinansiranju kulturne manifestacije od posebnog interesa za Grad Sarajevo „59. Internacionalni teatarski festival MESS 2019“;
- 2) Odluka o sufinansiranju kulturne manifestacije od posebnog interesa za Grad Sarajevo „57. Sarajevski dani poezije“;
- 3) Odluka o sufinansiranju kulturne manifestacije od posebnog interesa za Grad Sarajevo „25. Sarajevske večeri muzike SVEM 2019“;
- 4) Odluka o sufinansiranju kulturne manifestacije od posebnog interesa za Grad Sarajevo XXXV Internacionalni festival Sarajevo „Sarajevska zima 2019“;
- 5) Odluka o sufinansiranju kulturne manifestacije od posebnog interesa za Grad Sarajevo „23. Jazz Fest Sarajevo 2019“;
- 6) Odluka o sufinansiranju kulturne manifestacije od posebnog interesa za Grad Sarajevo „10. Balet Fest Sarajevo 2019“;
- 7) Odluka o sufinansiranju kulturne manifestacije od posebnog interesa za Grad Sarajevo „Sarajevo Big Band“;
- 8) Odluka o sufinansiranju kulturne manifestacije od posebnog interesa za Grad Sarajevo „5. Festival dječije umjetnosti FEDU 2019“;
- 9) Odluka o sufinansiranju kulturne manifestacije od posebnog interesa za Grad Sarajevo Međunarodni festival književnosti „BOOKSTAN. NO EAST. NO WEST“

Na osnovu navedenih odluka i Budžeta Grada Sarajeva za 2019. godinu, podržane su sljedeće kulturne manifestacije od posebnog interesa za Grad Sarajevo:

59. Internacionalni teatarski festival MESS

Organizator: *JU MES - Scena MESS*

59. Internacionalni teatarski festival Mess održao se od 28.09. – 04.10.2019. godine. U sedam festivalskih dana publika je u okviru glavnog programa imala priliku pogledati 15 predstava iz 12 država (Mađarska, Grčka, Belgija, Srbija, Francuska, Hrvatska, Crna Gora, USA, Španija, Italija, Njemačka, Bosna i Hercegovina) sa oko 300 učesnika. Dječiji program Mali MESS održao se paralelno sa Festivalom MESS i obuhvatio je četiri predstave za djecu, namijenjene različitim uzrastima, a održana je i jedna predstava za djecu i nastavnike. U okviru pratećeg programa MESS OFF organizovane su promocije knjiga, radionice, panel diskusije i forumi. Kao dio zvaničnog programa prezentovane su i dvije predstave iz Bosne i Hercegovine. Festival je imao takmičarski karakter, ali zbog umanjenja budžetskih sredstava od strane Federalnog ministarstva kulture i sporta Direkcija Festivala MESS, u dogovoru sa članovima žirija,

donijela je odluku da će nagrade biti dodijeljene naredne godine, kada će se i zatvoriti 59. Festival, dan pred početak 60. jubilarnog Festivala MESS, a nakon što svi pogledaju predstavu „Čehovljeva prva predstava“ iz Irske koja je trebala zatvoriti Festival. Dodijeljene su dvije nagrade Direkcije festivala MESS. Nagradu „Zlatni lovorov vijenac za doprinos umjetnosti teatra“ dobila je Jasna Diklić, a nagradu „Zlatni lovorov vijenac za razvoj scenske umjetnosti“ dobila je Fondacija Heinrich Boell.

Sarajevo Big Band 2019

Organizator: *Udruženje muzičara „Saraj Pro-Brass“*

Tokom 2019. godine, Udruženje muzičara „Sarajevo Pro-Brass“ realizovalo je pripreme za snimanje studijskog albuma pod nazivom „Sarajevo Big Band i prijatelji 2 Indexi“, koje uključuju izradu 10 aranžmana autora i dirigenta Ranka Rihtmana. Izrada aranžmana predstavlja prvu stepenicu i temelj predprodukcije navedenog studijskog albuma, a koji se nastavlja realizovati i u 2020. godini. Također, u dvorani Doma mladih Skenderija, 29.12.2019. godine održan je koncert „Sarajevo Big Band i Uroš Perić“, uz gostujuće muzičare iz Njemačke i Hrvatske.

57. Međunarodni književni festival „Sarajevski dani poezije 2019“

Organizator: *Društvo pisaca BiH*

Međunarodna književna manifestacija Sarajevski dani poezije održana je od 08. do 13. oktobra 2019. godine, imala je u fokusu crnogorsku književnost te autore iz ove susjedne zemlje. Iako u nešto skromnijem izdanju, na ovogodišnjem festivalu učestvovalo je 40 autora iz BiH, desetina iz Crne Gore, 4 iz Srbije, te gosti iz Austrije, Hrvatske, Luksemburga, Njemačke i Makedonije. Upriličen je i predfestivalski program „Posjeta pjesnika sarajevskim srednjim školama“, u kojem su učenici imali priliku čuti autorska djela i razgovarati o poeziji. Jedan od programskih projekata koji je ujedno i iskorak prema publici, je „Poetsko mapiranje grada“, odnosno svojevrsno virtualno bilježenje književnog nasljeđa Sarajeva, kartografija i brendiranje književnosti. U okviru manifestacije održana je promocija najuspješnijih pjesničkih ostvarenja u BiH u 2019. godini, te programi namijenjeni djeci i omladini, kao i likovne izložbe. Ovogodišnja književna nagrada „Bosanski stećak“ dodijeljena je Miloradu Miji Popoviću, crnogorskom pjesniku i publicisti.

25. Sarajevske večeri muzike SVEM 2019

Organizator: *Fondacija za muzičke umjetnosti*

Jubilarno dvadesetpeto izdanje festivala SVEM obilježeno je programom koncerata uz mnoštvo izvođača, kao i organizacijom radionice za studente muzike i mlade muzičare. Koncertom „U susret SVEM-u“ u Bošnjačkom institutu, u izvođenju predstavnika nove generacije evropskih i svjetskih muzičara, violiniste Luke Ljubasa te pijanistice Ruzhe Semove, započet je niz vrlo uspješnih i posjećenih programa koji su se održavali u periodu od 09. do 17.05.2019. godine. Uz Sarajevsku filharmoniju kojom je dirigovala Samra Gulamović, i maestra Ivu Pogorelića, jednog od najpoznatijih i najuticajnijih svjetskih pijanista današnjice, održan je veličanstven koncert u Narodnom pozorištu, kojim je ujedno i otvoren festival. U dvorani Narodnog pozorišta održan je i živopisan i publici blizak koncert „Putovanje“, kojim je uz operne arije, canzone i filmsku muziku, publika imala priliku putovati šarolikim muzičkim svijetom. Pored Bošnjačkog instituta u kojem je slovenački Gudački kvartet „Tartini“ i klarinetist Darko Brlek upriličili izvrstan koncert kamernе muzike, u prostoru Crkve sv. Josipa održano je nekoliko zanimljivih i upečatljivih koncerata većeg broja slovenačkih muzičkih umjetnika, kao i Ženskog vokalnog ansambla „Corona“. Završne večeri, u Crkvi sv. Josipa, održan je i koncert Gioachino Rossini: „Stabat Mater“, bosanskohercegovačkih umjetnika, članova Opere NPS, uz dirigenta Ivu Lipanovića, Hor Opere NPS i Sarajevsku filharmoniju. U okviru festivala, u saradnji sa kompozitorom i dirigentom Rankom Rihtmanom, Fondacija za muzičke umjetnosti pripremila je muzičku radionicu za studente muzike o jazz harmoniji.

35. Internacionalni festival Sarajevska zima 2019

Organizator: *Udruženje Međunarodni centar za mir Sarajevo (IPC)*

Festival „Sarajevska zima 2019“ je tradicionalni susret umjetnika cijelog svijeta, a ovogodišnje izdanje održano je pod motom „Buka i Bijes“. Festival je posvećen novoj publici, kulturnom stvaralaštvu i obrazovanju za sve generacije društva. U traganju za kreativnim odgovorom na izazove savremenog života

umjetnici sa svih kontinenata na Sarajevskoj zimi donose svoje kulture, tradicije i svoja iskustva da ih dijele i razmjenjuju pod pokroviteljstvom Generalnog Direktora UNESCO-a. Sarajevska zima programom obilježava 830 godina Povelje Kulin bana, 140 godina postojanja JU „Prve gimnazije“, 80 godina zajednice „Collegium artisticum“ i 50 godina Doma mladih OC Skenderija. Ovogodišnji počasni gost Festivala, koji se održao od 7.2.-21.3.2019. godine, je Mađarska.

25. Sarajevo Film Festival

Organizator: *Obala Art Centar* (po osnovu Ugovora o sufinansiranju kulturne manifestacije od posebnog interesa za Grad Sarajevo)

25. Sarajevo Film Festival održan je od 16-23.08.2019. godine pod pokroviteljstvom UNESCO-a. Audrey Azoulay, generalna direktorica Organizacije Ujedinjenih nacija za obrazovanje, nauku i kulturu (UNESCO) navela je kako festival dijeli vrijednosti UNESCO-a „kao događaj posvećen promoviranju dijaloga i tolerancije putem umjetnosti“.

Na Festivalu je prikazano 270 filmova iz 56 zemalja u 18 programa u četiri takmičarske selekcije - igranog, dokumentarnog, kratkog i studentskog filma. Čak 22 filma zabilježila su svjetsku, 4 filma međunarodnu, 25 regionalnu i 2 bosanskohercegovačku premijeru.

Dodjelom nagrada u Narodnom pozorištu u Sarajevu završen je službeni dio 25. Sarajevo Film Festivala. Dodijeljene su nagrade za najbolji dugometražni, dokumentarni, kratkometražni i studentski film, kao i CineLink nagrade. Nagradu za najbolji dugometražni film takmičarskog programa 25. Sarajevo Film Festivala u izuzetnoj konkurenciji, odlukom žirija, dobio je film „Take Me Somewhere Nice“, Ene Sendijarević. Srce Sarajeva za režiju dobio Emin Alper, za film „Priča o tri sestre“.

Najboljim glumcem 25. SFF-a proglašen je Levan Gelbakhiani, gruzijski glumac za ulogu u filmu „A onda smo plesali“, najbolja glumica festivala je Irina Jambonas, za ulogu u filmu „Ukrug“.

Počasno Srce Sarajeva, nagrada za izuzetan doprinos filmskoj umjetnosti, ove godine je uručena glumcu Timu Rothu (Velika Britanija), glumici Isabelle Huppert (Francuska), reditelju, producentu i scenaristi Alejandru G. Iñárrituu (Mexico), te reditelju Pawelu Pawlikowskom (Poljska).

Ekipa 25. Sarajevo Film Festivala brojala je 795 angažiranih osoba, 350 volontera, a Festival je pratilo više od 750 akreditovanih predstavnika medija. Na 25. SFF-u ukupno je prikazano 270 filmova iz 56 zemalja, a filmove je u sarajevskim otvorenim i zatvorenim kinima gledalo više do 100.000 gledalaca.

23. Jazz Fest Sarajevo 2019.

Organizator: *Udruženje Jazz Fest*

23. Međunarodni muzički festival Jazz Fest Sarajevo 2019. održan je od 07-10.11.2019. godine. Festival svake godine daje aktuelni pregled raznovrsne i bogate svjetske muzičke scene, a njegova aktuelnost ogleda se u redovitoj praksi predstavljanja evropskih i svjetskih premijera najznačajnijih umjetnika našeg vremena, uz predstavljanje značajnih umjetnika mlađe generacije. Programi Jazz Festa utiču na afirmaciju i promociju domaćeg stvaralaštva, bh. kulture i muzičkog nasljeđa ali i aktuelnih projekata bh. muzičara koji su i 2019. godine predstavljeni u okviru festivalskog programa Late Nite Stage.

Ove godine Jazz Fest je osvojio evropsku nagradu „EJN Award for Adventurous Programming 2019“ - Nagradu za odvažan festivalski program koju dodjeljuje Europe Jazz Network (EJN), mreža evropskih festivala i organizatora koncertnih programa. Dobitnika, među više od 1.000 evropskih festivala, koncertnih dvorana i klubova, a koji se bave organizacijom muzičkih programa, predlagala je 151 organizacija iz 35 evropskih zemalja.

9. Balet Fest Sarajevo 2019.

Organizator: *Udruženje za razvoj kulture i umjetnosti „Baleti“*

U okviru 10. „Balet-festa Sarajevo“ koji je održan od 19-25.09.2019. godine gostovali su internacionalni baletski umjetnici iz Španije, Slovenije, Srbije, te bh. baletni umjetnici sa jednom osnovnom idejom i ciljem, a to je unapređenje i predstavljanje baletne umjetnosti u najboljem svjetlu. Na festivalu su gostovali eminentni baletski umjetnici SNG Opera i balet Ljubljana sa predstavom „Dr. Živago“ i Bitez teatar iz Beograda sa predstavom „Carevo novo odelo“. Održan je i muzičko scenski performans Flamenco „Andro“ umjetnika iz Španije. Upriličena je i izložba posvećena velikanima baleta u Bosni i Hercegovini.

Realizacijom ovog projekta, između ostalog, doprinosi se ostvarenju novih dostignuća u baletnoj umjetnosti, školovanju baletnih umjetnika i usavršavanju.

4. Međunarodni festival književnosti „Bookstan 2019.“

Organizator: *Udruženje Međunarodni festival književnosti Sarajevo*

U okviru Međunarodnog festivala književnosti „Bookstan. No East. No West.“, predstavljena su djela poznatih svjetskih književnika. Četvrto izdanje Bookstana imalo je u fokusu regionalnu književnost, s uspostavljanjem književnog i intelektualnog mosta prema najprogresivnijim ishodišnim tačkama jugoslovenske književne i publicističke scene kasnih 90-tih. Težište programa Bookstana 2019. je na dvjema temama: Građanin svijeta i Fantom slobode, globalno aktualne socijalne, kulturne i političke teme. Festival je prezentovao autore savremene bosanskohercegovačke, slovenačke, hrvatske, srpske, crnogorske i makedonske književnosti. Poseban program i ove godine bio je posvećen predstavljanju bosanskohercegovačkih izdavača.

5. Festival dječije umjetnosti 2019.

Organizator: *Udruženje za promociju kulture „Fani“*

Festival dječije umjetnosti (FEDU) prvi je internacionalni umjetnički festival za djecu u BiH i regionu. U okviru Festivala održava se takmičarski dio iz oblasti teatra, književnosti, muzike i likovne umjetnosti u kojima učestvuju autori iz cijele regije.

FEDU je festival dramskog, literarnog, muzičkog i likovnog karaktera na kojem se afirmira stvaralaštvo za djecu ali i dječije stvaralaštvo. Festival dječije umjetnosti održan je od 3-7.05.2019. godine. Ova manifestacija je spojila igru, edukaciju i obrazovanje, te je bila prilika za afirmaciju knjige, teatra za djecu, muzike, ali i ostalih obrazovnih, društvenih i kulturnih vrijednosti. U takmičarskom pozorišnom programu izvedeno je devet umjetničkih ostvarenja iz Ljubljane, Zagreba, Rijeke, Vinkovaca, Mostara, Banje Luke, Niša i Kragujevca. Nagrađeni su oni koji su pokazali najuvjerljivije kreacije, napisali najdivnije bajke, pokazali originalnost u pisanju, muziciranju ili glumačkoj ekspresiji.

Nagrada Planeta Teatar - Grand prix za najbolju predstavu pripala je predstavi „Avanture malog Juju“ u režiji Renate Carola Gatice i izvedbi Gradskog kazališta lutaka Rijeka.

Nagrada za najbolji tekst ili adaptaciju pripala je Tamari Kučinović za dramaturgiju „Bajka o izgubljenom vremenu“ u izvedbi Pozorišta lutaka Mostar.

Najbolji glumci 5. Festivala dječije umjetnosti su, potpuno neodvojivi i fantastični dvojac Dejan Andrić i Marko Dukić za uloge Štuca i Muca u predstavi „Čudesni kontinenti“ u režiji Marka Dukića i izvedbi Nevid Teatra iz Banje Luke.

Nagrada za najbolju glumicu dodijeljena je Fatimi Kazazić iz Pozorišta lutaka Mostar.

Nagrada za najbolju režiju dodijeljena je Zoranu Mužiću za režiju predstave „Pinocchio“ Zagrebačkog kazališta lutaka, a nagradu publike „Najjači aplauz“ dobila je predstava „Pepeljuga“ GKJI Vinkovci.

Među književnim nagradama 5. Festivala dječije umjetnosti je i specijalna nagrada za životno djelo pod nazivom „Vitez od bajke“ koju je dobio Muhidin Šarić, vrhunski dječji pisac koji je, kako je rečeno, za svoje ukupno životno djelo posvećeno djeci odavno u njihovoj percepciji vitez.

Dobitnica specijalne nagrade „Zlatna jabuka“ za osavremenjavanje univerzalnih poruka bajke je književnica Jasna Šamić.

Nagrada za najbolju bajku po raspisanom konkursu u kategoriji afirmirani stvaraoci pripala je autorici Jasmini Žiljak-Ilinčić za bajku „Bojanova putovanja“.

Mladim autorima koji su učestvovali na konkursu i istakli se kao vješti kreatori također su dodijeljene nagrade za najbolje dječje pero „Aida“, a prva nagrada pripala je Atifi Vahidi Muković za bajku „Svilena i njena dobrotu pobjeđuju zlo“ iz JU Devete osnovne škole Sarajevo.

U Budžetu Grada Sarajeva za 2019. godinu izdvojeno je 200.000,00 KM za Sarajevo Film Festival, te 100.000,00 KM za primjenu Odluke o utvrđivanju i načinu sufinansiranja kulturnih manifestacija od posebnog interesa za Grad Sarajevo.

Tabelarni prikaz dodijeljenih sredstava organizatorima kulturnih manifestacija od posebnog interesa za Grad Sarajevo iz Budžeta Grada Sarajeva u 2019. godini

R.br.	Manifestacija	Organizator	Godina osnivanja	Iznos/KM
1.	59. Internacionalni teatarski festival MESS	JU MES - Scena MESS	1960.	12.000,00
2.	Sarajevo Big Band 2019.	Udruženje muzičara „Saraj Pro-Brass“		10.000,00
3.	Međunarodna književna manifestacija „57. Sarajevski dani poezije 2019.“	Društvo pisaca BiH		10.000,00
4.	25. Sarajevske večeri muzike SVEM 2019.	Fondacija za muzičke umjetnosti	1972.	15.000,00
5.	XXXV Internacionalni festival Sarajevo Sarajevska zima 2019.	Udruženje Međunarodni centar za mir Sarajevo (IPC)	1984.	11.000,00
6.	25. Sarajevo Film Festival	Obala art centar	1995.	200.000,00
7.	23. Jazz Fest Sarajevo 2019.	Udruženje Jazz Fest Sarajevo	1997.	11.000,00
8.	10. Balet Fest Sarajevo 2019.	Udruženje za razvoj kulture i umjetnosti „Baleti“	2009.	15.000,00
9.	Međunarodni Festival književnosti „BOOKSTAN. NO EAST. NO WEST.“	Udruženje Međunarodni festival književnosti „Bookstan 2019.“		8.000,00
10.	5. Festival dječije umjetnosti	Udruženje za promociju kulture „Fani“		8.000,00

Napomena: Svi organizatori kulturnih manifestacija, osim Udruženja Međunarodni centar za mir Sarajevo (IPC) su dostavili Izvještaj o utrošku odobrenih sredstava.